Aldschbrohchler

HARTMUT FILLHARDT



Wanni baadisch babbl am Dellefohn froue se doh wo ich hitt wohn, am middlrinn bimm nähwedrahn zuehorche meyschdens: «Wo komme Sie denn her?»

Unn wanni genou annehorch' spierich, dasse zimmlich neygierich worre sinn, dasse be-inndruggt sinn awwer des soue se nadierlich nit.

Unn wanni dann souh:
«Aus dem Hanauerland»,
dann nigge se: «Ah, Hanau, hinter Frankfurt!»
unn ich soou dann:
«Nein, am Oberrhein, gegenüber von Straßburg!»

Unn dann verzähli manchmohl d'G' chichd vunn de Grahfe von Hahnou (vunn denne bih Frangkfurd), unn de Schbieelschulde vumm Brinns Max vunn Bahde odder wahrs andersch erumm?

Awwer egahl, ich binn ächd froh dassichs noch kann - faschd e bissl schdolz, nähj, richdich schdolz - unn ich bin hitt soo froh, dass minner dittschlehrer immer gsäht hett hähmett isch wichtich.

Derr hett nämmlich öh gedicht' gschriwwe iwwers hahnouerland obwohlerjo ussm oschde kumme isch nohch'm krieyj.



Hitt kannis kumm noch bruche drusse, schon gar nit im beruef, so witt furt vunn d'hähm, 's dähd mich jo doch kenner verschdehn, blohß am Dellefohn middm Babba odder de Mamma isches ganz braggdisch.

Manchmohl, wanni mit ähnem vunn de Verwandschaft babbl, am Dellefohn, odder middeme Nohchber, willi hähmfahr ferre paar dääi ze bsuech, dann mergich, dass ich nidd wie'd meyschde uss de Verwandschaft odder wie d'Nohchbere ussm Dorf so e Mischmasch uss hohchdittsch un bahdisch babbl sunndann wirglich ummschallde kann - so richtich vunn jezz uff glich vunn hohchdittsch uff hahnouerisch unn widda zerugg - dess geht ganz oudomahdisch.

Fillicht binnijoh doch e bissl sprachbegabt ah, fer dess Wort ah, 's zweyde, also fer dieh zwey gibbds kenn Hahnouer ussprohch.

Fillicht isch's dohdrum, will ma im Hahnouerische nix abschdraggd uff de bungd bringd, sundern lieewa ganz fill drummerumm babbld.

Fillicht leyds awwer öh dohdrahn, dassich's immer mach wanni mit mir sälwer babbl, innedrinn, so wie Litt wo sich Gedicht' innfalle lohn des hald so mache wann se bieh sich sälwer t'hähm welle sinn.



Fillicht leyds öh dohdrahn,
dass mihr im Hahnouerische zwar devunn babble,
dass ieehmes ellähn isch,
awwer «einsahm»? Des gibbds nidd
im Hahnouerische.
Mir babble dann halt
midd uns sällwer odder
so schbrahchbegahbdi wie ich
die schrieewe halt
eggedicht.

Awwer wie ich dess jedds so anneschrieb, unn dohdebbieh ganz genou driwwer nohchdänk, leyds fillicht öh dohdrahn, dass ich schon als klähner bue fill ellähn gmachd habb, im wald, odder uff de madde drusse lieewä in d'bähm guggd habb' odder de wollge nohch - lieewä gedrähmd habb'

als midde anndere driwwer gebabbld, will die han doch meyschdens driwwer gelachd.

Fill schbehder hawwi erschd begriffe, dass ich Sache g'shähn habb, woh'd andere nitt g'sähn hann. Unn willse dess nit zuegänn han welle wo ich devunn verzählt habb, hann se halt lieewa mich usg'lacht.

Unn doh hett sich minni Schbrohch fillichd äähnfach nimm widdersch endwiggld, hett sich nimm ahngebassd, isch ähnfach schdehngebliwwe uffemm Niwwoh fumme glähne bue.